

## **Profion asymptomatig - Lleoliadau Addysg a Gofal Plant**

### **Cwestiynau Cyffredin**

#### **Beth yw profion asymptomatig?**

Profion asymptomatig yw profi pobl am y coronafeirws nad ydynt yn dangos unrhyw rai o'r symptomau arferol er mwyn gweld a ydynt yn cario'r feirws heb wybod.

Os oes gan unigolion symptomau'r coronafeirws, dylent [hunanyysu](#), trefnu i gael prawf adwaith cadwynol ploymerasau (PCR) (gallwch drefnu prawf drwy archebu [ar-lein](#) neu drwy ffonio 119) a pheidio â defnyddio'r prawf llif unffordd.

#### **Pam ydych yn cynnig profion?**

Nod y profion yw canfod y rhai sy'n cario'r feirws heb wybod yn gyflym fel y gallant hunanyysu. Bydd hyn yn golygu bod llai o bobl yn dal y feirws, gan leihau nifer y bobl sy'n gorfod hunanyysu ar ôl dod i gysylltiad agos â rhywun sydd wedi cael prawf positif. Bydd hyn yn lleihau'r effaith y mae'r coronafeirws yn ei chael ar addysg a gofal plant wyneb yn wyneb.

Bydd y profion hyn hefyd yn ein helpu i gael darlun mwy clir o'r hyn sy'n digwydd mewn gwirionedd yn ein hysgolion a'n lleoliadau, gan roi sicrwydd i'r gymuned ehangach.

Cydnabyddir bod profion asymptomatig yn debygol o arwain at gynnydd mewn cyfraddau achosion i ddechrau, ond bod y cynnydd hwn yn debygol o ostwng ar ôl i'r rhai sydd wedi cael prawf positif hunanyysu ac ar ôl i'r cadwyni trosglwyddo gael eu torri.

#### **Beth yw'r profion asymptomatig ar gyfer addysg a gofal plant?**

Bydd profion llif unffordd ar gael i leoliadau addysg a gofal plant a chwarae cofrestredig i'w dosbarthu i unrhyw unigolion cymwys sydd am gymryd rhan. Bydd hyn yn eu galluogi unrhyw un sy'n gymwys i gymryd prawf am y coronafeirws gartref ddwywaith yr wythnos. Mae'r profion hyn yn darparu canlyniad o fewn 30 o funudau ac nid oes angen eu prosesu mewn labordy.

#### **Pwy sy'n gymwys i gael y profion rheolaidd?**

Mae pob aelod o staff sy'n gweithio mewn lleoliadau addysg a gofal plant yn gymwys i gael eu profi.

Mae hyn yn cynnwys:

- Penaethiaid, dirprwy benaethiaid a phenaethiaid cynorthwyol
- Athrawon/darlithwyr
- Ymarferwyr a rheolwyr gofal plant a chwarae
- Gwarchodwyr plant
- Pob aelod o staff cymorth, er enghraifft:

- Gweithwyr cymorth dysgu
- Gweithwyr cymorth AAA
- Staff arlwyo
- Staff glanhau
- Gofalwyr/staff cynnal a chadw
- Cynorthwywyr gweinyddol
- Cynorthwywyr addysgu
- Gweithwyr cludiant
- Myfyrwyr HCA

Hefyd, bydd holl ddisgyblion hŷn ysgolion uwchradd ym mlynnyddoedd 10-13 a holl ddysgwyr Addysg Bellach yn gallu cael profion llif unffordd er mwyn cymryd profion asymptomatig rheolaidd ddwywaith yr wythnos, ynghyd â'r ddarpariaeth bresennol ar gyfer y staff a restrir uchod.

### **Pa ddysgwyr fydd yn gymwys i gael profion rheolaidd?**

Rydym yn gobeithio y bydd pob dysgwr ym mlynnyddoedd 10-13 a phob dysgwr mewn colegau addysg bellach yn gallu cael profion llif unffordd pe byddent yn dewis cymryd prawf asymptomatig ddwywaith yr wythnos.

### **A ddylai dysgwyr a chanddynt anghenion cymorth ychwanegol gymryd rhan yn y profion hyn sy'n cael eu cynnig?**

I rai dysgwyr a chanddynt anghenion cymorth ychwanegol, mae'n bosibl na fydd yn briodol cymryd profion o dan unrhyw amgylchiadau. Dylai ysgolion weithio gyda rhieni/gofalwyr a'r rhai sy'n gweithio agosaf gyda disgyblion a chanddynt anghenion cymorth ychwanegol i benderfynu a fydd y profion yn briodol, gan ystyried anghenion yr unigolyn.

Mae asesiadau risg yn chwarae rôl allweddol wrth ystyried anghenion unigol pobl ifanc a chanddynt anghenion cymorth ychwanegol, a gellid eu defnyddio i ystyried a fydd y rhaglen hunan-brofi yn briodol (gan ystyried y potensial am gefnogaeth gan rieni neu warchodwyr).

### **Nid wyf ar y rhestr o bobl gymwys, ond rwy'n gweithio mewn lleoliadau addysg neu ofal plant. Ydy hyn yn golygu na fydd modd imi gael prawf rheolaidd?**

Dylai pawb sy'n gweithio'n rheolaidd mewn lleoliadau addysg a gofal plant bob dydd gael cynnig profion. Rydym yn gweithio gyda phartneriaid i sefydlu ffyrdd o ddarparu profion i weithwyr proffesiynol sy'n gweithio'n rheolaidd mewn lleoliadau addysg a gofal plant, ond nad ydynt yn uniongyrchol gysylltiedig ag un ysgol neu leoliad. Mae hyn yn cynnwys proffesiynau megis gyrwyr cludiant ysgolion neu golegau, athrawon cyflenwi, hebryngwyr teithio a gwarchodwyr plant.

## **Pa leoliadau all gynnig profion rheolaidd?**

O ran lleoliadau addysg:

- Ysgolion Cynradd
- Ysgolion Uwchradd
- Ysgolion Arbennig
- Ysgolion Annibynnol
- Colegau Arbenigol Annibynnol
- Colegau Addysg Bellach
- Ysgolion Canol
- Unedau Cyfeirio Disgyblion

Mae'r holl staff gofal plant a chwarae yn gymwys i gael eu profi, gan gynnwys y rhai sy'n gweithio ym mhob rôl mewn lleoliadau gofal dydd a gwarchodwyr plant. Mae hyn yn cynnwys:

- gofal dydd llawn
- gofal sesiynol
- gofal crèche
- grwpiau chwarae/Cylchoedd Meithrin
- darpariaeth gwaith chwarae wedi'i staffio
- darpariaeth Dechrau'n Deg.

## **Ai rhywbeth gwirfoddol yw'r profion?**

Ie, rhywbeth gwirfoddol yw cymryd prawf, ond rydym yn annog pawb sy'n gymwys i fanteisio ar y cynnig er mwyn lleihau ymhellach y risg o drosglwyddo asymptomatig.

Os oes gan unigolion symptomau'r coronafeirws, dylent drefnu i gael prawf PCR (gallwch archebu [ar-lein](#) neu drwy ffonio 119) a pheidio â defnyddio'r prawf llif unffordd.

## **A oes rhaid imi gymryd prawf er mwyn cael mynd i'r ysgol / coleg?**

Nac oes. Diben y profion hyn yw ceisio canfod y rhai sy'n cario'r feirws heb ddangos unrhyw symptomau yn gyflym a gofyn iddynt hunanynysu. Bydd hyn yn tarfu llai ar addysg wyneb yn wyneb.

Nid oes unrhyw brawf yn berffaith ac ni ddylai profion llif unffordd gael eu defnyddio fel cadarnhad nad yw'r unigolyn yn cario'r feirws er mwyn i'r ysgol neu'r coleg oherwydd weithiau mae'n bosibl na fydd y prawf yn canfod bod rhywun yn heintus.

Ar ôl i'r unigolyn ddeall y broses profi a'i fod wedi darllen yr hysbysiad preifatrwydd, os yw'n dewis cymryd rhan mae'n ymrwymo i weinyddu'r prawf a darparu ei ganlyniadau ei hun. Dylai lleoliadau addysg a gofal plant sicrhau bod unigolion yn darparu eu canlyniadau (positif, negatif neu annilys) i'r GIG drwy'r porth canlyniadau. Dylai'r canlyniadau gael eu rhannu â'r gweithle hefyd i gefnogi'r gwaith olrhain cysylltiadau lleol.

## **Beth yw Prawf Llif Unffordd?**

Mae profion llif unffordd (Antigen) yn prosesu samplau swab o'r trwyn a'r gwddf. Mae'r ddyfais, sy'n edrych fel prawf beichiogrwydd yn y cartref, yn canfod protein (antigen) a gynhyrchir gan y feirws. Os yw'n bresennol yn sampl y person, bydd llinell liw yn ymddangos ar y ddyfais rhwng 20-30 munud ar ôl prosesu.

## **Beth yw'r gwahaniaeth rhwng profion PCR rheolaidd a Phroffion Llif Unffordd?**

Mae'r prawf RT-PCR a'r prawf llif unffordd yn gofyn am gymryd swab o'r trwyn a'r gwddf. Defnyddir yr RT-PCR ar gyfer y rhai sydd â symptomau, gan ddadansoddi'r swab mewn labordy.

Defnyddir prawf llif unffordd ar gyfer pobl heb symptomau. Mae modd dadansoddi'r swab gan ddefnyddio dyfais llif unffordd gartref, fel y ceir canlyniadau o fewn awr. Er nad yw profion llif unffordd mor sensitif â phroffion RT-PCR sy'n cael eu prosesu mewn labordai, mae cyngor gwyddonol wedi dangos bod cywirdeb profion llif unffordd cyson gystal â phroffion RT-PCR, a dyma pam rydym yn ailadrodd y profion ddwywaith yr wythnos.

## **Pam ydych chi'n gofyn i leoliadau addysg a gofal plant gynnal profion rheolaidd?**

Mae Llywodraeth Cymru yn cynnig cyfle i staff mewn lleoliadau addysg a gofal plant a phob dysgwr hŷn mewn ysgolion uwchradd (blynyddoedd 10-13) a phob dysgwr mewn addysg bellach gymryd profion ddwywaith yr wythnos. Mae'r profion yn wirfoddol, er bod pawb sy'n cael cynnig y prawf yn cael ei annog i fanteisio arnynt.

Mae lleoliadau addysg a gofal plant wedi gweithredu'r mesurau rheoli a amlinellir yng nghanllawiau'r sector i leihau'r risg o drosglwyddo'r feirws. Bydd y profion yn galluogi lleoliadau i leihau'r risg hon ymhellach drwy atal pobl heb unrhyw symptomau rhag trosglwyddo'r coronafeirws.

Mae cynlluniau peilot diweddar yng Nghymru a'r DU yn ehangach wedi dangos sut y gall profion rheolaidd, cyflym gael eu defnyddio'n effeithiol a chael effaith gadarnhaol mewn ysgolion a lleoliadau eraill.

Mae'r drefn profion rheolaidd yn profi unigolion asymptomatig – y rhai heb symptomau'r coronafeirws. Os yw person asymptomatig yn cael canlyniad prawf positif drwy'r profion rheolaidd (gweler y cyngor pellach ar broffion positif isod), rhaid iddo [hunanyysu](#) yn unol â'r canllawiau er mwyn osgoi trosglwyddo'r feirws ymhellach. O ganlyniad, bydd profion ddwywaith yr wythnos yn canfod achosion o'r coronafeirws na fyddai wedi dod i'r golwg fel arall, gan helpu i atal y coronafeirws rhag lledaenu yn y gymuned.

Er bod profion ddwywaith yr wythnos yn ein helpu i atal lledaeniad yn y gymuned, mae'n bwysig i leoliadau barhau i weithredu'r mesurau rheoli a amlinellir yn y canllawiau sy'n benodol iddyn nhw er mwyn lleihau'r risg o drosglwyddo a'r tebygolrwydd o ganlyniadau profion positif.

### **A yw'r profion yn cael eu darparu yn rhad ac am ddim?**

Ydyn. Ni chodir tâl am y profion.

### **Sut ydw i'n archebu fy mhroffion?**

I ddechrau, anfonir pecynnau profion i bob ysgol, coleg, lleoliad darpariaeth amgen a lleoliad gofal plant cofrestredig sydd ar agor.

Bydd yr ysgol neu'r lleoliad yn ymgymryd â'r gwaith o gasglu'r profion (7 mewn bocs i staff a 3 mewn bocs i ddisgyblion/dysgwyr) dros unigolion sydd am gael prawf rheolaidd.

O ran unigolion nad ydynt am gael y prawf ddwywaith yr wythnos, cânt ddal i ddod i'r lleoliad cyn belled nad ydynt wedi dod i gysylltiad ag achos positif nac wedi datblygu symptomau neu gael canlyniad positif i brawf COVID-19 drwy raglen brofi arall.

### **Rwy'n bennaeth/rheolwr – sut dylwn i fynd ati i archebu profion ar gyfer fy lleoliad?**

Bydd cyflenwad cychwynnol o becynnau yn cael ei anfon yn awtomatig i bob ysgol, coleg, lleoliad darpariaeth amgen a lleoliad gofal plant cofrestredig. Bydd amserlen ar gyfer danfon y profion yn cael ei chyhoeddi i bob lleoliad cyn iddynt gael eu danfon.

Bydd cyflenwad pellach o becynnau profi yn cael eu hanfon yn awtomatig i ysgolion a lleoliadau tan yn ddiweddarach yn y flwyddyn pan fydd modd i ysgolion a lleoliadau reoli eu cyflenwad o brofion eu hunain drwy wefan. Bydd rhagor yn cael eu darparu i ysgolion a lleoliadau cymwys pan fydd modd gwneud hyn.

### **Pa mor aml ddylwn i gymryd y prawf?**

Argymhellir y dylid cymryd y prawf ddwywaith yr wythnos, h.y. dau brawf 3-4 diwrnod ar wahân i'w gilydd bob wythnos. Mater i'r unigolyn a'r lleoliadau unigol yw gwneud trefniadau i bennu ar ba ddiwrnodau y mae'r profion yn cael eu cymryd.

### **Pa bryd ddylwn i gymryd y prawf?**

Argymhellir yn gryf y dylid gwneud y profion cyn i chi gyrraedd y lleoliad yn y bore. Po fwyaf o amser sydd rhwng cymryd y prawf a mynd i'ch lleoliad, y lleiaf cynrychioladol fydd canlyniad y prawf o'ch cyflwr presennol o ran yr haint.

## **Oes rhaid i mi gymryd y prawf ar yr un diwrnodau bob wythnos?**

Oes, dylech ddilyn amserlen sefydlog wrth gymryd y profion, e.e. yr un diwrnodau a'r un amser bob wythnos.

## **Os ydw i wedi cael coronafeirws o'r blaen yn y 90 diwrnod diwethaf, a ddylwn i barhau i gymryd profion ddwywaith yr wythnos?**

Ni ddylai unrhyw un sydd wedi profi'n bositif am COVID-19 drwy brawf PCR gael ei brofi ar y rhaglen hon o fewn cyfnod o 90 o ddiwrnodau o'r adeg y dechreuodd ei salwch neu o adeg ei brawf (os oedd yn asymptomatig).

Nid yw'r rhaglen addysg a gofal plant yn rhaglen ar gyfer unigolion sy'n symptomatig a ni ddylid defnyddio'r profion o dan yr amgylchiadau hynny. Os ydych chi'n dechrau datblygu symptomau COVID-19 newydd o fewn y cyfnod hwn, ni ddylech gymryd eich prawf llif unffordd. Trefnwch brawf PCR ar unwaith a hunanynysu. Gallwch drefnu prawf drwy archebu ar-lein neu drwy ffonio 119.

## **Rwyf wedi cael fy mrechu – a oes angen imi gymryd y profion o hyd?**

Oes, mae'r prawf llif unffordd yn cadarnhau p'un a ydych yn heintus i bobl eraill. Y cyngor gwyddonol cyfredol yw y dylai unigolion sydd wedi'u brechu gymryd y profion o hyd yn yr un ffordd ag unrhyw un sydd heb ei frechu. Caiff y sefyllfa ei hadolygu'n rheolaidd, a rhoddir gwybod am unrhyw newidiadau yn y cyngor drwy arweinydd ysgolion a lleoliadau.

## **Sut bydd y broses brofi yn gweithio?**

Darperir pecynnau profion llif unffordd cartref ar gyfer lleoliadau addysg a gofal plant, y bydd modd i unigolion eu defnyddio ddwywaith yr wythnos, bob 3-4 diwrnod, cyn dod i'r gwaith neu'r lleoliad, ac yn ddelfrydol yn y bore. Nid oes angen prosesu'r profion hyn mewn labordy, a gallant roi canlyniad cyflym o fewn tua 30 munud. Nid oes gorfodaeth ar unrhyw un i wneud y prawf, ac ni fydd angen darparu tystiolaeth o ganlyniad negatif, na darparu tystiolaeth o fod wedi gwneud prawf, cyn gallu dychwelyd i'r gwaith yn gorfforol. Fodd bynnag, rydym wir yn annog pawb i fanteisio ar y ddarpariaeth.

Mae profion llif unffordd wedi'u defnyddio'n eang ac yn llwyddiannus i ganfod achosion asymptomatig o COVID-19. Mae gallu gwneud y prawf yn gyflym ac yn hwylus yn help i ganfod y feirws mewn unigolion asymptomatig, na fyddent fel arall wedi cael eu profi. Mae profion llif unffordd wedi'u cymeradwyo gan Asiantaeth Rheoleiddio Meddyginiaethau a Chynhyrchion Gofal Iechyd, ac maent yn hollbwysig yn y frwydr yn erbyn y feirws. Nid yw'r rhaglen brofi ar gyfer unigolion asymptomatig yn disodli'r polisi profi ar gyfer y rheini sydd â symptomau. Bydd disgwyl o hyd i unrhyw un sydd â symptomau, p'un a ydynt yn manteisio ar y system brofi ar gyfer unigolion asymptomatig ai peidio, fynd am brawf PCR a dilyn canllawiau Profi, Orlhain, Diogelu y GIG, gan [hunanynysu](#), hyd nes y byddant wedi cael eu canlyniad.

Rhaid i leoliadau ac unigolion barhau i ddilyn yr holl fesurau diogelu cyfredol – nid yw profion ar gyfer unigolion asymptomatig yn disodli'r rhain nac yn eu gwneud yn llai pwysig wrth reoli'r feirws.

### **Pa mor gywir yw canlyniad prawf llif unffordd?**

Mae profion llif unffordd wedi'u defnyddio'n eang ac yn llwyddiannus i ganfod COVID-19 mewn unigolion asymptomatig. Mae gallu gwneud y prawf yn gyflym ac yn hwylus yn help i ganfod y feirws mewn unigolion asymptomatig, na fyddent fel arall wedi cael eu profi.

Mae gwaith gwerthuso clinigol helaeth wedi'i wneud ar brofion llif unffordd. Mae gwerthusiadau Public Health England a Phrifysgol Rhydychen yn dangos bod y profion hyn yn ddigon cywir a sensitif i gael eu defnyddio yn y gymuned at ddibenion sgrinio a goruchwylio.

Mae profion llif unffordd yn gallu adnabod achos o heintusrwydd cynnar a phryd y mae unigolyn ar ei fwyaf heintus. Mae'r unigolion hyn yn tueddu i ledaenu'r feirws i lawer o bobl, ac felly mae gallu'r prawf i wybod pwy ydynt yn dal i fod yn bwysig.

Mae'n bwysig cofio mai haen ychwanegol yw'r profion hyn o ran y mesurau diogelu iechyd, yn ogystal â gorchuddion wyneb, cadw pellter cymdeithasol ac ati. Rhaid i bobl sy'n cael canlyniad negyddol gydymffurfio o hyd â mesurau diogelu perthnasol eu gweithle.

### **Sut mae cymryd prawf?**

Nid oes angen unrhyw hyfforddiant. Gallwch wneud y prawf eich hun, ac fe fyddwch yn derbyn cyfarwyddiadau clir gyda'r profion, ond yn gryno:

- Golchwch a sychwch eich dwylo'n drylwyr
- Agorwch y pecyn prawf (gan ofalu peidio â chyffwrdd â'r rhan feddal)
- Agorwch eich ceg yn llydan. Defnyddiwch y swab i rwbio cefn eich gwddf yn gadarn bedair gwaith ar bob ochr
- Tynnwch y swab allan o'ch ceg heb gyffwrdd â'ch dannedd, eich tafod na'ch gymiau
- Rhowch y swab yn ofalus yn eich trwyn (2.5cm y tu mewn) a'i rwbio ar hyd leinin eich ffroenau 4-5 gwaith
- Tynnwch y swab allan (gan ofalu nad yw'n cyffwrdd ag unrhyw beth)
- Rhowch yn y tiwb i'w brofi am 30 munud ac arhoswch am y canlyniad (bydd llinell liw yn ymddangos os yw'n positif)
- Golchwch eich dwylo'n drylwyr ar ôl gwaredu'r prawf

Bob tro y bydd unigolyn yn cymryd prawf bydd angen iddo gofnodi'r canlyniad drwy'r porth canlyniadau ar-lein (y gellir cyrraedd ato drwy ffôn clyfar) neu drwy ffonio'r rhif a ddarperir yn y pecyn. Bydd angen gwneud hyn bob tro wrth gymryd prawf, boed yn ganlyniad negatif neu positif.

## **Sut mae unigolion a chanddynt anghenion cymhleth yn cymryd y prawf?**

I rai dysgwyr a chanddynt anghenion cymorth ychwanegol, efallai na fydd yn bosibl iddynt swabio a phrosesu'r profion eu hunain. Yn yr achosion hyn, efallai y bydd yn bosibl i rieni neu warchodwyr gefnogi'r broses. Mater i'r unigolyn a'i rieni/gwarchodwyr fydd ystyried a yw'n briodol i'r dysgwr gymryd rhan yn y rhaglen brofi, gan ystyried anghenion yr unigolyn.

## **Beth ddylwn ei wneud os yw'r canlyniad yn positif?**

Os yw'r canlyniad yn positif bydd angen i chi:

- gofnodi hyn drwy'r porth canlyniadau ar-lein. Argymhellir yn gryf bod disgyblion/dysgwyr yn gofyn am gymorth eu rhieni/gwarchodwyr.
- Rhoi gwybod i aelodau eich aelwyd o'r canlyniad a gofyn iddynt ddechrau hunanynysu cyn gynted â phosibl.
- Bydd angen ichi hefyd roi gwybod i'ch ysgol, eich coleg neu'ch lleoliad
- Bydd angen i'r rhai sy'n gweithio mewn lleoliadau gofal plant hysbysu Arolygiaeth Gofal Cymru
- cadarnhau'r canlyniad positif drwy drefnu prawf PCR mewn canolfan brofi cyn gynted â phosibl. Gallwch drefnu prawf drwy archebu [ar-lein](#) neu drwy ffonio 119.

Yn y cyfamser, rhaid i chi ddilyn y [canllawiau hunanynysu](#) a gwneud yn siŵr eich bod chi a phob aelod o'ch aelwyd yn hunanynysu am 10 diwrnod. Dylai'r cyfnod hwn ddechrau yn syth ar gael canlyniad prawf positif o'r prawf llif unffordd.

Os yw canlyniad y prawf PCR yn negatif gallwch ddod â'ch cyfnod hunanynysu i ben, ac ailddechrau cymryd prawf ddwywaith yr wythnos.

## **Beth ddylwn ei wneud os yw'r canlyniad yn negatif?**

Os yw canlyniad y prawf yn negatif, bydd angen i chi gofnodi hyn drwy'r porth canlyniadau ar-lein ond ni fydd angen cymryd camau pellach a gallwch barhau â'ch diwrnod fel arfer. Rhaid cofnodi pob canlyniad.

## **Sut mae gwaredu'r pecyn prawf?**

Beth bynnag fydd canlyniad y prawf, unwaith y bydd eich prawf wedi'i gwblhau, rhowch holl gynnwys y pecyn prawf a ddefnyddiwyd yn y bag gwastraff a ddarperir. Seliwch y bag, a'i gadw mewn lle diogel am 72 awr. Wedi hyn, rhowch y bag yn eich bin gwastraff cartref cyffredinol.

## **Oes modd defnyddio'r prawf ar gyfer aelod o fy nheulu?**



Na, mae'r profion ar gyfer y rhai sy'n gweithio mewn lleoliadau addysg, gofal plant a chwarae a'r dysgwyr hŷn hynny mewn ysgolion uwchradd (blynyddoedd 10-13) a dysgwyr mewn addysg bellach. Mae hyn yn golygu na ddylid defnyddio'r profion ar gyfer aelodau o'r teulu.

Ni ddylai profion llif unffordd gael eu defnyddio os byddwch yn datblygu symptomau. Dylech drefnu prawf PCR os ydych yn datblygu symptomau.

### **Sut dylwn storio'r profion?**

Dylid storio'r pecynnau profion dan do mewn lle sych lle nad yw'r tymheredd yn gostwng islaw 2 radd nac yn codi uwchlaw 30 gradd. Wrth gymryd a phrosesu'r profion, dylent fod ar dymheredd ystafell (tua 15 i 30 gradd).

Bydd angen i leoliadau greu a chadw cofnod mewn perthynas â'r pecynnau profion, ynghyd â chofrestr i gofnodi'r pecynnau sy'n cael eu dosbarthu a rheoli'r cyflenwad.

### **Pam mae dysgwyr hŷn ysgolion uwchradd (blynyddoedd 10-13) a dysgwyr addysg bellach yn rhan o'r system brofi hon?**

Nid oes unrhyw dystiolaeth eto i awgrymu trosglwyddiad eang yn ein hysgolion a'n colegau, ond nid oes ffordd o wybod ble y gallai'r feirws gael ei drosglwyddo y tu allan i'r amgylchedd dosbarth a reoleiddir. Gyda hyn mewn cof, rydym hefyd yn cynnig y profion llif unffordd rheolaidd hyn a fydd yn cael eu cymryd ddwywaith yr wythnos i ddysgwyr hŷn mewn ysgolion uwchradd ac i ddysgwyr mewn colegau. Byddwn yn dechrau drwy gynnig profion i ddysgwyr ym mlynyddoedd 10-13 ym mhob ysgol a choleg addysg bellach.

Er bod profion dwywaith yr wythnos yn ein helpu i atal y lledaeniad yn y gymuned, mae'n bwysig ein bod yn parhau i ddilyn y canllawiau ar reoli risgiau'r coronafeirws.

Byddwn yn parhau i adolygu'r profion a gynigir yn rheolaidd.

### **Pam nad yw plant iau yn rhan o'r system brofi hon?**

Mae'r data iechyd y cyhoedd ar hyn o bryd yn dangos bod nifer yr achosion o COVID-19 yn uwch yn y grwpiau blynyddoedd hŷn ac yn gostwng gydag oedran. Cydnabyddir bod grwpiau hŷn mewn ysgolion uwchradd a cholegau addysg bellach yn llawer llai tebygol o fynd yn sâl gyda COVID-19. Fodd bynnag, mae'r dystiolaeth yn awgrymu bod y grŵp oedran hwn yn ôl pob tebyg yn trosglwyddo'r feirws i'r un graddau ag oedolion, lle nad yw plant ifanc yn ei drosglwyddo i'r un graddau. Nid yw plant iau wedi'u cynnwys ar hyn o bryd, felly, yn y system brofi.

Byddwn yn parhau i weithredu yn ôl yr hyn y mae'r data yn ei ddweud wrthym, ac yn adolygu'r sefyllfa yn rheolaidd o ran pwy sy'n gymwys i gael eu profi.